

皇帝聖旨於某處奉修靈寶九幽玉匱遷神
明真大齋若干日夜行道事訖投簡水府願
神願仙三元同符九府水帝十二河源江河
淮濟溟泠大神乞削罪錄上名九天請詣水
府金龍驛傳

太歲某年某月日具位臣某於某處告文

元始五老上帝高尊十方至真太華靈仙赤
文告命無幽不闕上御九天請下玉文日月
五星北斗七元中告五嶽四方靈山下告河
海十二泉源九府水帝溟泠大神今日上告
萬願開陳修齋行道上告九天總校圖錄削
滅罪根幽夜開朗超度魂神三塗息苦長夜
蒙原冤仇解散上昇諸天行道事訖投簡靈
淵福祚隆永帝業長延請以龍簡告盟水管
乞如所陳金龍驛傳

呪畢眾官再禮

次讀土簡文

今欽奉

皇帝聖旨於某處奉修靈寶九幽玉匱遷神
明真大齋若干日夜行道事訖投簡靈壇願
神願仙長生度世飛行上清中黃九土戊己
黃神土府五帝乞削罪刑請詣中宮投簡記
名乞如所告金龍驛傳

太歲某年某月日具位臣某於某處告文

天地開張元氣分靈三元同符十方朗清五
老上闡主死領生丹書赤文元始上經普告
無下九地皇靈今日上告萬仙定生修齋行
道上告九天總校圖錄削滅罪根九地開朗
遷度魂神太陰息苦六趣寧閑和冤釋對上
生諸天行道事訖投簡靈壇福流億世帝祚
長延請以龍簡告盟地官乞如所告金龍驛
傳

呪畢眾官再拜

投簡於壇上天井中或埋於月辰之上

次吟投龍讚

祈真登紫府金章

次稱名位降神設醮

具法職奉行靈寶明真大齋法事某嶽某帝
先生小兆真人臣某等稽首再禮臣謹奉

皇帝修建遷神大齋

謹奉降玉京玄都紫微上宮十方大聖眾至

真諸君丈人飛仙真人玉童玉女應感分輝
降臨醮座

謹奉降天地靈仙諸天上聖日君月君日月
帝君真人神仙玉童玉女降臨醮座

謹奉降北極向陳天皇大帝君北斗七星君
南斗六星君三台六星君二十八宿君周天
三百六十五度星中大神星中帝君星中真
人降臨醮座

謹上請東方青帝九氣君南方赤帝三氣君
西方白帝七氣君北方黑帝五氣君中央黃

帝一氣君五帝真人玉童玉女降臨醮座

謹上請三元君上元天官中元地官下元水
官三宮九府百二十曹五嶽大神十大洞天
三十六洞天二十四化三河四海九江水帝
十二河源九宮真人十二仙君九天司命五

嶽丈人九天使者儲副正職佐命大神天仙
地仙飛仙神仙玉童玉女兵馬騎乘降臨醮
座

謹上請三洞四輔侍經真官仙公仙伯仙卿
大夫九天御史玄中大法師天師嗣師系師
上古三師經師籍師度師三洞威神三寶官
屬降臨醮座

謹上請靈寶官屬領仙監齋直符真官侍香
將吏玉童玉女六甲神將六向玉女六丁玉
女社稷將吏一切靈司降臨醮座